



Sesida dals

Communitgà ils

Protocol nr.

21 d'avrigl 2020

23 d'avrigl 2020

335

Incumbensa Cavegn

concernent la midada da la procedura d'admissiun a las scolas medias grischunas

Resposta da la Regenza

En il chantun Grischun succeda l'entrada en ina scola media grischuna tenor las disposiziuns da l'Ordinaziun davart la procedura d'admissiun a las scolas medias (Ordinaziun d'admissiun a las scolas medias; DG 425.060). La procedura d'admissiun consista d'in examen chantunal unitar (ECU), e per regla vegnan resguardadas las prestaziuns preliminaras en il rom d'ina nota d'admissiun. Per las scolaras ed ils scholars (SeS) da la 6. classa primara sco er da la 2. classa secundara vegn calculada la nota d'admissiun sin basa da tschertas notas da mintgamai l'ultim semester avant il ECU. Cun excepziun dal Principadi da Liechtenstein applitgeschan tut ils commembers da la CDEP-ost (Conferenza dals directurs da l'educaziun publica dals chantuns da la Svizra da l'ost e dal Principadi da Liechtenstein), pia er il Grischun, in examen sco instrument da selecziun principal.

La Regenza è s'occupada gia pliras giadas cun la concepziun da la procedura d'admissiun. Sin basa da la situaziun speziala cun las scolas medias en il chantun Grischun (otg scolas medias privatas, ina scola media chantunala) ha ella mussà ch'il ECU saja da mantegnair, cunzunt perquai che la renunzia augmentass fermamain il squitsch sin las persunas d'instrucziun assegnantas (cf. PCG 4 | 2008/2009, p. 640). Dal Rapport da furmaziun da la Svizra 2018 dal Center svizzer da coordinaziun per la retschertga da l'educaziun resorta che proceduras d'admissiun cun examen cuntanschan – per selecziunar SeS cun l'abiltad e cun la voluntad da prestaziun – megliers resultats che proceduras d'admissiun senza examen. Igl ha er pudì vegnir mussà che la probabilitad da vegnir admiss al gimnasi malgrà competenzas insuffizientas, è cleramain pli gronda en chantuns senza examen d'admissiun ch'en chantuns, nua ch'in examen è l'instrument da selecziun principal. Resguardond in access cun schanzas egualas ad ina scolaziun da scola media è la procedura d'admissiun cun ECU la meglra soluziun tenor las enconuschientschas scientificas. Ultra da quai è il ECU – ord vista da la Regenza – in instrument strategic important per reparter ils giuvenils dal stgalim secundar II sin la furmaziun duala e sin las scolas

medias en il rom da las quotas vertentas (cf. missiva da la Regenza al Cussegl grond, carnet nr. 11/2011–2012, p. 1296).

La Regenza è anc adina da l'avis ch'i tutgia tar l'incumbensa fundamentala da l'instrucziun regulara da preparar ils SeS per ils ECU ed ha perquai ina tenuta critica envers curs da preparaziun externs per ils examens. Sco quai ch'il Rapport da furmaziun 2018 conferma, n'èn tals curs dentant betg decisivs per in success duraivel en scola. Igl è dentant da supponer ch'i dess in augment da las purschidas d'instrucziun supplementara ordaifer la scola en cas d'ina procedura d'admissiun senza ECU e che talas purschidas vegnissan tratgas a niz – tenor l'experientscha – da SeS da classas socialas pli bainstantas. Uschia fiss l'egualitad da las schanzas messa en dumonda anc pli fitg che tar ils curs da preparaziun.

Ils resultats dals ECU dapi l'onn 2010 cumprovan il cuntrari da quai che vegn supponì en l'incumbensa, pia che l'access a las scolas medias privatas en las regions vegnia restrenschi tras il sistem actual. Ina cumparegliaziun da las quotas da success dals SeS che han fatg l'examen a la Scola chantunala grischuna cun ils SeS che han fatg l'examen en ina scola media privata, mussa che la quota da success tar tuts dus examens (gimnasi inferiur sco er examen unitar per il gimnasi sco er per la scola media spezialisada e commerciala) è stada tut en tut pli auta a las scolas medias privatas che a la Scola chantunala grischuna.

La renunzia ad in ECU fiss ina midada fundamentala dal sistem e stuess – ord vista da la Regenza – succeder sin basa da fatgs. Quai en spezial er, perquai che la Regenza è responsabla per la garanzia da la qualitat tenor l'art. 7 da la Lescha davart las scolas medias en il chantun Grischun (Lescha davart las scolas medias, LSM; DG 425.000). Sa basond sin questas explicaziuns propona la Regenza al Cussegl grond da midar questa incumbensa sco suonda:

Cun l'intent da stgaffir la basa da decisiun per adattar la procedura d'admissiun a las scolas medias incumbenseschan las sutsegnadras ed ils sutsegnaders la Regenza da preschentar a maun d'ina expertisa externa ils avantatgs ed ils dischavantatgs da proceduras d'admissiun cun e senza examen d'admissiun.



Il president:

Dr. Chr. Rathgeb

En num da la Regenza

Il cancellier:

Daniel Spadin